

'Bukan dari Sungai Gombak'

GOMBAK - Insiden bajir kilat yang berlaku Rabu lalu bukan disebabkan oleh limpahan air dari Sungai Gombak.

Adun Gombak Setia, Hasbullah Ridzwan berkata demikian sebagai mem-bidas kenyataan Timbalan Ketua Umno Bahagian Gombak, Datuk Megat Zulkarnain Omdardin dalam sebuah akhbar tempatan yang memberikan maklumat tidak tepat mengenai insiden berlaku.

Memetik laporan akhbar tersebut, Megat mendakwa kerajaan negeri gagal menaik taraf sistem saliran Sungai Gombak seiring dengan pembangunan menyebabkan berlakunya banjir kilat Rabu lalu.

Hasbullah berkata, lokasi banjir kilat didakwa bukan datang dari Sungai Gombak sebaliknya disebabkan sebuah pembangunan berhampiran Lebuh raya Lingkaran Tengah 2 (MRR2).

"Lokasi kejadian dengan Sungai Gombak sangat jauh dan melibatkan kes berbeza. Sebaliknya banjir kilat berpunca apabila tanah yang sepatutnya menjadi kolam takungan telah disewakan kepada pengusaha pusat jualan kereta menyebabkan kolam sedia ada tidak mampu menampung air setiap kali berlakunya hujan lebat.

"Sebarang pembangunan perlu mendapat kebenaran merancang terlebih dahulu dan ia boleh diatasi melalui penguatkuasaan. Jadi kita harap pihak bertanggung jawab ambil tindakan bagi mengatasi masalah tersebut dan mengenal pasti pemiliknya," katanya.

Mengulas berkaitan naik taraf Sungai Gombak katanya, kawasan tersebut terlibat dengan projek River of Life (ROL) dan banjir kilat di kawasan terjejas sebelum ini telah berkurangan sejak lima tahun kebelakangan ini.

"Jika ada pun hanya melibatkan banjir kilat atau takungan air daripada jalan persekutuan Gombak-Bentong yang diselenggara JKR Persekutuan.

"Kita telah mendesak JKR Persekutuan menyalurkan bantuan mencukupi kepada JKR negeri untuk membolehkan penyelenggaraan pada jalan dan longkang itu dapat dilakukan dengan sempurna.

"Banyak jalan rosak tidak diturap sepenuhnya sebaliknya hanya ditampal sementara sistem pembetung (culvert) pula banyak tersumbat dengan sampah dan pasir antara punca kekerapan berlakunya takungan air dan banjir kilat atas jalan persekutuan itu," katanya.